

2
I. N. 7.

DISSERTATIO MEDICO-CHEMICA
De
**MEDICAMENTORUM GALE-
NICORUM ET CHEMICORUM ÆQUI-
POLLENTIA,**

Quam
Fortunante summo Numine
& annuente Amplissimo Senatu Aca-
demico


Publicæ ventilationi subjiciet
CHRISTIANUS RAMUS MELCH. FIL.
Respondente
GERHARDO DAVIDIS FAYE,
In Auditorio,



Anno 1711. die 23 Maji horis p. m. solitis.


HAFNIÆ, Typis Georgii Matthiæ Wering,

304673



Imprimatur,

JOH. MULENIUS.





α η ω.

Prologus.

Postquam naturæ liberalitate non contentus primus homo, naturæ Domino secundus esse parum existimans, æqualis fieri affectaverat, tam infensam sibi ac inimicam fecit universam naturam, ut omnia elementa in humani generis perditionem conjurasse diceres; urendo enim, ignis, suffocando, aqua, venenosa effluvia & pestiferos vapores exhalando, terra, vehiculum hisce præbendo, aër, interitum hominis quæerunt; in hoc tamen miserrimo statu prohibuit summa naturæ Domini benignitas, ne pro quibus perdi voluit Creator, perderet creatura. Divinâ itaque factum est curâ, ut inter conjuratos hos statuam humani corporis destructuros fratres plus quam Babelica oriretur discordia, ut quod unus destruere, alter restaurare conetur; quod incendit ignis, exstingvit aqua, quæ terra evomit venena, ignis reddit alexiteria, quod dissolvit ignis, conglutinat terra. Sed parum hoc, quod alter alteri se opponat, plus est, quod unus idemque, quos immisit hostes, ipse expellere cogatur, ita quas infert spiculas ignis, has ipse extrahit, quos glacialibus aqua ligavit vinculis, hos ipsa solvit, quæ terra profert venena, hæc ipsa antidotis debellat. Sic divinum Numen eandem, cui maledixit, terram, medicinam producere fecit salutarem. Omnia autem, quæ sanitati humanæ vel conservandæ vel instaurandæ dicata sunt, ad tria communiter

A

niter

niter regna reducuntur, ex quibus Medici, regnorum præfecti, contra hostiles morborum impetus subsidia quæerunt, suppeditant tria hæc regna, animale scil. vegetabile & minerale, materiam, unde varia Medici conficiunt tela; sed intestinum quoque inter ipsos ortum est bellum, alii enim Galenum sequentes integra pharmaca morbis opponere malunt, alii autem Vulcani ope in sua principia resoluta & Chemicis præparationibus confecta medicamenta efficaciora esse putant. Hoc bellum componere, noster erit in hac dissertatione scopus, & Galenica cum Chemicis ita conciliare, ut ostendatur, suam singulis in medicina esse laudem, nec illa his plane posthabenda, nec illis hæc absolute præferenda. Ne autem quis *amethodias* nos arguat, in 3 capita totam nostram differt: dispeciemus, quorum *1^{um}* quæ Chemica, quæ Galenica sint ostendet, *2^{dum}* materiam utrisque communem esse monstrabit, *3^{tium}* præparationes & compositiones conciliabit.

CAP. PRIMUM.

Ut ergo præscripta methodo procedamus, quænam Galenicorum, quænam autem Chemicorum nomine veniant pharmaca *imo* ostendemus. Sunt itaque Galenica (à Galeno sic dicta) omnia vulgari modo præparata medicamenta, ut decocta, infusa, Electuaria, Olea infusa & expressa, cerevisiæ & vina medicata, syru-
pi, conservæ, aquæ destillatæ simplices, pulveres, pilulæ, aliaque, quæ passim apud pharmaceuticos habentur. Chemicorum nomine veniunt subtiliori modo præparata omnia, ut extracta, essentiæ, spiritus, tincturæ, aquæ destillatæ compositæ, salia, flores, Croci
&

& quæ sunt reliqua itidem apud Pharmaceuticos passim obvia. Sed hic oritur quæstio annon Galenica quædam ad Chemica & vice versa referri queant. Credo non plane impossibile esse; salia eqvidem plantarum lixiva antiquis non plane ignota fuisse, ante me probavit summum Chemiæ decus beatus Euerg: Borrichius in l. contr. Contr. ex Arist. l. 2. meteor. c. 3. est in umbria (inquit) locus harundine & juncis frequens; quos exurunt, cineremque in aqua decoquunt, donec parum superfit humoris, qui ubi refrixit in salem abit copiosum. Varia quoque adducit ex Plinio & Galeno loca, ex quibus evidentissimum saltem Galeni locum hic proferam: ille existat lib. 9. de medic. simpl: facult. c. 41. de metallis: Abluto (inquit) cinere fit Lixivium, cinerem autem ustorum corporum reliquias Græci vocant, five natura sint lapidea, five arborum & animalium particulae; fit ergo lixivium, pro ejus, quod eluitur, natura, ejus quidem quod empyreuma, five igneam naturam habet acerrimam, ipsum quoque acerrimum, ejus, quod tale non est, etiam moderatius. Quid autem credam hæc ex cineribus parata lixivium esse, nisi lixivium Chemicorum salia, quæ, (ut & hoc ab ipso Galeno discant Galenici) non per vim ignis naturam integri deponunt, sed essentielles etiam post ustionem vires retinent. Tincturas, essentias, extracta & olea Chemicorum, an cum Galenicorum infusis, decoctis, oleis expressis, vinis & cerevisiis medicatis conciliari possint, prolixè disputare, meum hic non est, attamen plane improbabile mihi non videtur.

CAPUT SECUNDUM.

Tria antea diximus esse regna, ex quibus pro debellanda morborum cohorte subsidia petunt Medici, regnum animale, in quo animalia, cum rationali, rationis expertia, vegetabile, in quo cum arboribus innumeræ plantæ, Minerale, in quo metalla cum succis metallicis. Triplex hoc regnum varia suppetitat simplicia, ex quibus variè postea præparantur & componuntur medicamenta, alia grossiori modo, quæ Galenica, alia subtiliori, quæ Chemica dicuntur, utraq; tamen triplici huic regno suam debent materiam; nec enim veri Chemici vegetabilia, nec veri Galenici omnia metallica respuunt; (de Pseudo- vel Chemicis, vel Galenicis non loquimur) quod verò Chemici non omnia, quæ è stirpibus petuntur, fastidiant, ut falso ipsis affingit Conringius l. de med. Hermet. aliq; pseudo Galenici, fatebitur quilibet, quem ipsorum scripta inspicere non tædet, legat quis scripta Paracelsi, & si non omnia vacat, saltem ipsius scholia & observationes in Macri poëmata de herbarum virtutibus, & inveniet singulas herbas singulis oppositas esse morbis; Consulat quis Quercetanus, strictum alias metallicorum defensorem in sua pharmacop. restit. Libav. Helmont. aliosq; & videbit eos medicamenta è vegetabilibus petita non adeo fastidire, quin ea potius in æquali cum metallicis pretio habeant; testantur insuper tot de plantis essentia, extracta, olea destillata, spiritus, tincturæ, salia plantarum lixiva, Chemicos è foro medico vegetabilia non eliminare velle. Nec tamen inficias eo, in vegetabili regno sufficientia contra quemlibet morbum posse inveniri
tela

tela, ut è regno minerali, ne dicam & animali plura emendicare non opus sit, sed quoniam ex innumeris, quæ terra profert plantas, paucarum saltem virtutes nobis sint notæ, reliquæ, in quibus maxima forsan latet virtus, nobis ignotæ; & si vel maxime cognitæ fuerint, an ergo solis illis acquiescendum? an quia unus oculus homini sufficere posset, eruendus est alter? Quidni ergo sola utendum brasica, (ut verbis beati euerg. Borrichii utar) cum certum sit ex Plin. l. 20. c. 4. totum populum Romanum integris sexcentis annis hac medicina usum esse? Quidni solo Rhabarbaro utendum, cum hanc herbam omnibus opposuerit morbis Mathias Tilingius in sua Rhabarbarologia? Divinam potius grato animo agnoscamus benignitatem, quæ non unicum sed plurima cuilibet morbo opposuit medicamenta. Nec metalla è foro medico proscribunt ea, quæ obducunt Misochemici quidam, quasi essent venenosa & naturæ humanæ inimica, vel saltem periculosa & ponderosa nimis; sed inanis ille est metus; sint quædam venenosa dum integra, igne autem vexata venenum facile depouunt, imo interdum duo venenosa sibi invicem mixta saluberrimam gignunt medicinam; sint e. gr. mercurius sublimatus & antimonium, prius seorsim venenum, juncta in salutare abeunt medicamentum, scilicet cinnabarim antim. egregium in febribus & morbis malignis diaphoreticum; naturæ inimica non sunt, ut credunt, quia à natura vinci nequeunt; alimentorum enim est vinci, ut rectè observavit Sennertus, medicamentorum autem vincere; periculosa non sunt nisi in manibus imperitorum, in quibus non minus periculosa multa vegetabilia; ponderositas tollitur sublimatione, cal-

cina-

cinatione, aliisq; præparationibus Chemicis; ut taceam ponderositatem compensari minori dosi, cum enim integris Iunciis propinantur vegetabilia, sufficiunt pauca ex metallicis grana. Quod autem nec veri Galenici metallica omnia respuant, eorum scripta satis evincunt; Consulant, qui negant Pseudo-Galenici, ipsum Galen. ll. de medic. simpl. facultat. de remed. parab. item de composition. medic. & si plane sceptici non sunt, non modo negare sed & dubitare desinant; plura qui desiderat, legat recentiores methodicos, & videbit metallica ipsis non plane esse tædiosa.

CAP. TERTIUM.

Probato jam materiam utrisq; esse communem, restat de præparationibus controversia; utrum Chemicè an Galenicè tractata pharmaca sint efficaciora? pro Chemicis pugnant sequentia: quod nempe ope Chemiæ tutiora, gratiora & promptiora evadant medicamenta. Tutiora quidem, quod sine metu recidivæ morborum radices tollant, præcipuè ubi altiores in corpore radices egerint morbi, si enim in intimis corporis recessibus vel sanguis vel alii humores inspissati sint, parum possunt galenica, quippe quorum crassiores particulae in primis viis vires ferè amittunt, Chemicis ergo hic agendum, salibus nempe volatilibus aliisq; medicamentis efficacioribus, quorum subtiliores particulae ad intima corporis penetrantes humores pristino statui restituere possunt. Gratiora, cum purum ab impuro, utile ab inutili arte Chemica separantur; Commendant se quoq; exigua dosi, libentius enim sumet ægrotus,

tus, si purgandum, pauca extracti panchymag. Crollii vel refinæ Scammonii grana, quam multas electuarii diacatholici seu diaphænici drachmas, si sudor elicendus, libentius pauca Bezoartici mineralis aut antimonii diaphoretici grana, quam potionem quandam sudorificam ad descriptionem non paucos pedes longam, & sic de cæteris. Promptiora: altius enim penetrant & efficacius operantur Pharmacorum particulae, remotis, quibus ligatae erant fecum vinculis; in regno animali, oleum pingvedinis, sive hominis sive alius cujusdam animalis expeditius ipsâ pingvedine, spiritus urinæ ipsa urina efficacius operantur. In regno vegetabili, promptius vires exserunt, essentiae, spiritus & salia plantarum ipsâ plantis, citius spiritus vitales reficit aqua Cinnamomi, vel tinctura ejusdem quam ipsum cinnamomum integrum; in febrili sanguinis æstu domando plus præstat unica drachma salis absinthii vel Carduibened. quam si integræ eadem plantæ ad plurimas uncias propinentur. In regno minerali promptius agunt metalla in crocum sublimata, aliisq; modis variè præparata, quam integra, multum quidem præstat ambra grysea in reficiendis langvescentibus corporis spiritibus, efficacius tamen operatur ejusdem essentia de reliquis par esto judicium. Plurima contra hæc obducunt misochemici, quæ cum omnia recensere non vacat, publico conflictui reserventur; unicum saltem hic addam, nempe quod ajunt acria nimis & corrosiva esse plurima Chemica, præprimis mineralia, verum propter hoc non rejici merentur, nisi eodem jure rejiciantur multa vegetabilia, quid enim acrius allio, sinapi, nasturtio raphano &c. quibus tamen quotidie in-

ter epulas utimur, nec firmum est concludere ab exterioribus ad interiora; non enim sequitur, roduntur corpora quædam à spiritibus chemicis, ergo in intestinis idem producat effectus; solvuntur lapides, margaritæ, corallia, aceto & succo citri, stomacho & intestinis nulla infertur noxa, eodem modo, quò aqua fortis dissolvit dura metallorum corpora, mollem ceræ substantiam relinquit intactam, acetum dissolvit duriores ovæ testam, illæsa manente tenera interiori membrana, reliqua quæ opponunt, reciprocari possunt. Sed fit magna Chemicis laus, suâ tamen nec destituuntur Galenica; Dantur enim medicamenta (observante Sennerto, quæ vires suas ita per totum corpus diffusas habent, ut vel omnino, vel maxima ex parte perdant, si partes separantur. Testatur Heurnius in sua praxi, se dolores colicos decocto anisi plus simplici vice sedasse, oleo autem ejusdem frustra egisse, testatur experientia Rhabbarbarum tostum vires laxandi amittere; Quid de herba Thee dicam, quæ nondum Chemicis præparationibus subjecta, suas tamen vires contra varias infirmitates in infuso communicavit, eadem est ratio aliarum plantarum indigenarum, de quibus videndus beatus Euerg: Borrichius in tract. de usu plantar. indig. Qvis adhuc arcanum novit præparare ex cortice Peruviano, vires tamen integri quotidie experiuntur Practici in tertiana & quartana fugandis. Qvis ignorat virtutes Camphoræ analysin chymicam minus expertæ. Periti ergo Medici erit pro morborum natura, & indicantium ratione nunc Chemicis, nunc Galenicis uti; nam non omnia Chemica bona, nec omnia Galenica mala.

Tantum.

Corol.

Corollaria.

Cantores amant humores, non moraliter modo, sed & Physicè.

Non aliud Chemici docent per salem, sulphur & mercurium, quam Galenici per qualitates primas.

Eandem esse adhuc motus quantitatem, ac fuit ab initio probabile est.

Potius albicantem cerebri substantiam, quam glandulam pinealem sensorium commune dixero.

Egregiè dixit Lucianus:

πίθηκος ὁ πίθηκος καὶ χρύσεια ἔχει σύμβολα.



